

光緒山西通志

義行錄下

錄五之三

山西通志弟百四十四

賜進士出身頭品頂戴兵部侍郎兼都察院右副都御史巡撫山西提督軍務臣張煦奉
旨監修

國朝

諸州縣

劉有光遼州人周急好施嘗於漳河造橋二十六道並備歲修資以利行人兵燹後難婦孳孳贈費送歸各籍掩骼給槨多義行順治十二年旌表

常士奇榆社人縣協濟南關驛按里輸芻久爲民累順治中士奇與縣人喬國幹張大成曹鏊等捐金置租以資供億一時惠之其後驛歸官辦乃籍其租入義學云

張維榆社貢生素急公尙義康熙中歲饑捐穀五百石以賑貧民

張漢英榆社監生康熙壬寅歲祿出粟賑饑性喜文學嘗出千金建文峯塔邑中書院亦所經始云子廷僚官長清知縣割腴田三百畝資書院經費繼成父志

趙育德遼州人幼貧乾隆乙亥歲饑罄所積粟以濟八村饑民不足復稱貸以佐之沒後鄉黨爲勒碑於墓志其惠

李中鯉榆社附貢好施篤於宗族孤貧無依者胥厚資之

張泰安榆社人父玠官洋縣丞卒於官泰安年甫童力歸父柩父同官某死家貧棺久淹亦出金並歸其喪

張彥儒榆社諸生道光乙未大饑出穀百餘石以賑鄉里與兄林儒並敦行誼同時常世溫者亦好施嘗散籽種助婚葬人以耆德稱之

以上遼州

時曙沁州人姜瓖之變負母避入山出覓食爲賊所拘置營

中令守所掠婦女晤俟閒盡縱之去方逃奔幾爲賊獲卒免於難人謂有默相之者

張維禎沁州諸生好施予嘗仿社倉法輸粟爲同里辦公之需兩置義冢以掩骼髑髏貧卹匱孜孜不倦

陳廣文沁源人力田起家好行其德遇里中徭役挺身獨任村民無迫呼之擾數十年素乏嗣歲值編審縣令汪士鵬稔其行曰爾善人不應無後爲預報一丁注籍曰天賜越歲果生子卽名天賜云

胡琪沁源歲貢事親以孝聞家窶甚嘗持錢市米遇逋賦被繫者傾囊與之拾遺金審知爲里長所催官錮登門舁還從洪洞范進士鄒鼎遊最久范極稱之人傳其自沁入洪度神佛嶺一客販爲虎所噬琪揮以袈虎大嘯去徐痊其殘骸云

程玠沁州廩生績學工文家貧授徒以養其親稍有餘輒以推人不少吝嘗爲衛某館師某病且死以三孤爲託教養如父並克成立倡設宗祠時薦歲祀一依古禮

陰功沁源貢生急公好義遇事有關於風化文教者以力任之乾隆中邑令劉建書院輸資爲倡規畫久遠士林德之王汝礪沁州恩貢孝友性成族黨有貧乏者以時賑恤素與某商善朝夕過從一日方坐肆中值商將購貨南省几列巨金數十枚忽聞叩門聲倉卒啟視藏之及辨裝檢金竟缺其一肆中有來述於汝礪者察其狀似疑及已乃嘖然曰吾與若等戲耳行當以原物來歸遂贖金如式付之自是絕迹不入其門無何肆中以年終掃除得原金於櫝旁竹簍衆相視失色乃以春正盛筵延汝礪至出金謝過不遑汝礪坦然謂

君輩果能相信必不詢我且恐疑及貧夥致生不測吾此舉爲企交亦以省事無容芥蒂也人由是益頌爲長者

王文山沁州人道光乙酉拔貢孝友純篤敦尙節義嘗客會城有友死歸其喪一故人子乞食於途收養之長爲授室乙未省試州人郝孔陽醉墮南城外壕陷泥淖中三日不出文山蹤迹得之昇歸已寓力救得甦素多力遊太谷遇驚馬負轅奔馳有小兒十數方臥轍嬉戲從車後手挽之立止一市詫爲異人善書生平所讀書多手寫之

楊杰沁州廩貢事親以孝聞與州人裴紳之友善裴官江南鹽大使杰爲辦裝貸金資其行未嘗責償裴亦有風義花縣令楊紹祖客死貧無能斂傾囊周之並歸其喪

劉汝梅武鄉歲貢素敦孝友輕財好施族黨貧乏無依者生

養死葬略無難色地方公務有裨於民生者輒奮袂直前過不便或衆執兩可獨正論相規卒後人思之不衰

魏牧武鄉附貢性豪邁趨人之急不吝推解鄉黨中才堪貿易者授之資本貧將輟讀者助以膏火失業者佃之田露宿者與之宅邑中大舉如驛站兵差城池工役皆倚以辦道光乙未歲祲糴粟數百石減價以糴賴以全活者甚衆

程百里字震峯武鄉人少精騎射既入庠恥不知書發憤取經籍晝夜伏讀久之皆成誦乃就村塾爲童子師來者不計脩脯視如子姪督課甚嚴以幼童默經得補弟子員者至十餘人嘗有句云平生守拙無他術到處逢人勸讀書夙與郝明經廷魁善令其子師事之郝病爲之稱藥量水躬親執炊晝夜無間郝以死友目之

以上沁州

張景星平定人明季拔貢子青雲年十五於道中得遺金四百以告景星曰金至四百非大賈則公帑也不然亦必有急其必還之已而樂平盛驛丞以驛卒醉失帑金控諸州州爲繫所過逆旅及旁舍兒拷之景星知非詐乃入州衙使人報拾金者在是無窮治爲也遽出付之趙忠毅南星爲文紀其事後官保定府通判

王本源平定人性豪俠有膽氣因荒糧之累順治年獨力叩閤備愬情苦得

恩旨永免合州荒糧祀忠義祠

張績平定人嘗輸穀二百石倡設義倉同時劉令譽者亦好施冬必廣設衣粥以濟貧乏偶行平潭遇凍僵者解所衣裘裹之昇至逆旅旣甦贈貲遣去不問其姓名

張藩孟縣人以拔貢官定興知縣有治績累遷至潼關兵備道順治丙申孟大饑賑粟千石銀四百兩

特旨嘉獎之

馬中健壽陽諸生康熙庚子歲大饑出粟賑濟窮民以田產來質者皆燬其券還之由貢選廣昌訓導未任卒祀忠義祠子獻瑞歲貢玉瑞廩生雍正中歲祿徧施籽種及秋稔有償者辭不受邑令胡匾旌其門

劉文典壽陽諸生康熙丙子丁丑歲薦饑集村人月餼以粟婦女亦按口給棉俾力績佐食村無流亡

王璐孟縣舉人輕財尚義鄉有貧至鬻女者罄囊金贖之不少吝壽陽典史某爲子聘某守備女典史罷官某遂欲寒盟璐百計勸成賣馬以完其婚時女年已三十有五云

郭如玉孟縣人康熙己未饑出穀百石賑之州同鄭仔亦於是年賑粟百石增生王耀祖遇荒歲節已食保全鄉里

趙培孟縣恩貢以厚德稱家人獲盜憫其貧賙而縱之王吉明者耆民也有盜其禾者遇之佯爲不識舉所刈助令負去鄉鄰以貧乏來告必量力給之

于錦雲孟縣諸生父瑜嘗焚券千餘金縣城外秀水久病涉錦雲承父志建橋其上

賈恒年張鳳起並平定人乾隆己卯歲饑各出粟倡賑以濟鄉鄰其後乙未春有翟雲照者賑粟四百石罄所積復糴米七百石並樂平賑之

祁均樂平歲貢篤學敦行事親盡孝歲饑盡所積散之族黨霍安仁壽陽人乾隆癸卯施穀救荒出資開通嶺道卒祀忠

義祠

王瑄壽陽人嘗買櫝於史姓昇至家將重加修斲脫櫝底有複板敗絮盈中檢之得百五十金蓋史之先人所藏者遂還之史感其義聞於官官贈匾旌焉

王貴孟縣人乾隆七年歲祲出粟百石散給鄉里郝忠漢者亦於癸卯賑饑忠漢少赤貧嘗乞糠於富翁某負歸傾囊出糠得白金二錠蓋富翁倉卒寄藏而誤投忠漢囊也駭而返之其後墾田塞外竟以力農起家

韓相孟縣人孟有巨盜魏二越平遙獄懸賞緝捕呂某者有僕癡愚貌類魏呂貪賞攜過相曰殺此子代魏夫誰識相斥其妄旋別去呂舊與鄉人王某張某有隙乃僞爲王書令善視魏二乘夜陰達於張令僕作魏裝逸去而以竊盜首二人

於平遙獄具相聞之挺身出白其冤置呂於法時論快之
白萬海孟縣監生嘗焚連券史孔筆拾還遺金並有義聲
朱西成劉星如並平定人英敏有膽略嘉慶間有左道惑衆
者其黨散布各鄉西成力斥之作歌示勸戒令鄉民勿爲所
惑尋僻星如聞於官擒治其魁白是教匪絕迹

黃昊奎平定賈人也嘗買妾直隸定興入室啼哭甚哀詢知
爲夫家貧僞爲女而鬻以養親者卽鍵戶趨出召其夫攜歸
所與金並不責償縣令聞而匾獎之

王步雲平定武舉嘉慶丙寅歲荒出粟數百石以濟貧乏王
致中商體乾並州民也亦於癸酉甲戌賑饑又尹仲素好施
年饑出所積徧餼村人

楊時壯平定人性喜周急篤於友誼嘗客京師樂平進士王

祚昌謁選與同舍疾甚時壯扶臥起治藥餌惟謹同里張自新補官福建邀與偕往甫至自新及其戚某相繼死負債纍纍百計歸其柩並爲償負自是家頗衰落終身不悔

王進學平定監生與州人周竹林並以好義急公聞馬如明嘗焚券七十餘紙人稱厚德

潘思用青陽諸生乾隆癸卯歲歉竭資拯饑不足復質產貸金以繼遇地方事有不便者必力爭之嘉慶辛酉

欽賜副榜卒祀忠義祠

史維經孟縣人與兄翼經同學友愛嘗獨居有鄰女來奔嚴拒之翼經諸生亦有風義

馬錫禹孟縣人居鄰凌井鎮嘉慶丁卯歲饑錫禹每三日輦米至鎮平糶遇窮苦者輒分給不責償子德寶亦好施有父

風

孫裕平定人授職同知鄉居多義舉五渡河歲漲發爲行旅
害出錢三千緡傍山別開車道喜培養士風遇地方有碑文
教事力成之又王光國於道光初獨修武院並爲士林所稱
李來壽監生賀銳諸生並平定人瞻族恤鄰人多其義

翟緣林平定人路拾八百金昇寄戚家失金者訪至如數與
之又張保中趙文舉葛鳳翥白挺王現皆以還遺金見稱而
馬如璠者有客寄金客死無知其籍者以金施諸村祠刻石
以志

荆殿芳平定人道光乙未丙申歲薦饑賑米百石全活村人
同時監生荆植及周培儒樊聚張培厚並出粟拯災減價平
糶其後光緒大祲植復輸金助賑而樊聚孫大德亦以散粟

焚券見稱鄉里

劉企蚤壽陽附貢道光丙申歲饑與兄歲貢景蚤族人瑞五罄家儲施濟子翼之由進士官至甯陝廳同知有循聲

劉雪鶴孟縣人以武生隸營伍膂力過人道光間從征三載身披鐵甲日夜不解凱旋時同營陣亡者辨髮悉束腰間寢食必俱鐵甲當坐處幾至穿敝以功授樂平營千總年九十卒

高鵬旺鄭允恭並壽陽人事親俱以孝聞周恤親族急人患難一時稱之

閻存德壽陽諸生與從兄爾德並好行其德一日輦粟往市鬻之遇故識方貧窘乞貸卽盡數與之同縣陳克信潘萬桂並喜推解居鄉多義舉

秦美章孟縣人家貧充里書時丁徭未歸地畝久爲民累道光初諸生孫映奎者屢訴大府未得直就商之美章美章慨然以入都請

命自任乃資以行及訴之都憲仍解歸省太府按治罪以越訴得脫歸乃復入都聞

鑾輿將出冒死遮道哀呼徑達

天聽下法司按問得情遂奉查辦之

旨由是丁悉歸地而通省若陽曲各縣有丁徭仍舊或僅歸半者從而照辦至十餘處云

穆續緒孟縣監生敦倫尙義族兄某客死塞外走三十里以喪歸恤其妻子

趙振倫孟縣監生居鄉多厚德積貲券八千餘金臨終悉焚

之賈世府嘗推產讓兄亦以焚券稱義

趙萬年孟縣諸生道光壬辰歲祲偕族人出粟賑濟爲粥以食餓者凡二年乃止同時諸生馬澤千總田生玉武生張守文皆以賑饑爲鄉里稱頌

張敦安孟縣監生營道拾票錢訪還其人趙執中趙襲並縣民皆拾還遺金

祁朝駿壽陽歲貢咸豐中籌辦鄉團倡輸錢米以保鄉里祁文端公稱其立節祗行不隨流俗急公仗義無所吝惜云王樹林孟縣人服賈於豫嘗渡河遇有覆舟者急呼曰能救一人者給錢二萬人爭拯之無一死者粵逆北犯集商民團練出粟爲倡以急公授職千總

張承業孟縣監生精於醫歲施藥濟人承父志焚通券二千

餘金卒祀孝義王秉忠者內行純摯其戚某令保安邑有構

訟者夜持重金求爲關說力斥之

以上平定州

賈成眞定襄諸生明季寇蠭起發儲粟以濟貧乏團丁壯以嚴守禦姜逆之變五臺賊張五桂高山謀攻所居之芳蘭堡值元夜賊方聚飲成眞偵知率眾擣其巢擒斬四十餘人賊黨解散同里薄成功亦諸生凡結團築堡多所規畫撫部並旌獎之

樊虞佐定襄人順治初叛將柳同春攻縣城虞佐率家丁協力捍禦設伏破其眾皆遁走同春尋至省就撫及姜瓖之變縣城失守知縣祝文光戰死虞佐亦被重傷以計擒賊渠寸磔之旣而宣府總兵李延壽以兵來援聞而嘉之招入軍幕辭不就與虞佐同事有石文煥者姜逆散布僞劄縣人多爲

所惑率村人力拒之

賀景賢定襄人已丑寇變率鄉人保蘭台堡力戰拒賊當道
獎其能康熙初山左大饑窮民流徙縣境者甚多爲捐米煮
粥市兩月一時咸頌之

智安仁定襄人居鄉多行義順治初賊攻所居南鄭堡率眾
守禦堡陷猶奮死鬪手格三人力竭被擒擁入山將甘心焉
突一賊目至大聲急呼曰此義人智安仁也釋縛送歸安仁
熟視之乃向所哺之餓人也曉以大義一時解散甚眾而諸
生梁而述者賊掠及所居亦單騎入其巢陳禍福散其黨
彭龍忻州監生好行其德里有以貧將鬻妻者二人力止之
給以資畀營生計後並以貿易起家又於州南捐金平治險
道設立茶亭行人惠之李昇者亦嘗於客中遇鬻妻養親者

解囊贖還人多其義

郭正修定襄人嘗讓產兄弟以友愛稱敦睦族里建宗祠立義學婚葬有不能舉者必力助之他若施茶以惠行人解囊以救凍者義舉甚多宋紹環者事親孝居鄉亦多風義

樊福恒定襄圩者道拾遺金坐待其人還之樊明倫家貧業賈子煥發獲遺金明倫詫爲不祥令訪還失者

鞏安國定襄武舉儻侔有志節嘉慶間有甘州張姓者僑居縣境以舍藥爲名實教匪也鄉民受其惑者甚多知縣林捕繫之搜得一簿所列二萬餘人將上報安國力辨其誣會張畏罪服毒死事得解鄉民爭贖金爲謝輒辭不受曰解人厄而以爲利其異於盜也幾希遠近推爲威德

周岷陽忻州武舉嘗入都逆旅中聞哭聲甚哀問之乃姑媳

子出外八年不反貧窘將嫁媳以圖兩活有布商以四十金
媒定晚卽去姑媳泣別耳岷陽亟封十金僞作子書言近獲
利千金三月後卽歸云云姑得書立還布商金相慶於室越
三月其子果歸如書中言壽甯宰樊裕發爲作傳

趙金保忻州人道拾遺金訪還之人稱長者又前高村民王
某者佚其名亦以還金稱義

王琅忻州人輕財好施予道光十二年歲祲減價平糶里人
薛河東爲文紀其事

樊斗照定襄諸生弟某業商設米肆康熙中歲祲太原民挽
小車來糴者日數十人肆中故存有北客米客適他去斗照
令弟盡數借糶曰彼饑如此待米主至斃者多矣其後糴者
多不償而北客復有責言爲代償如數家以此中落邑人劉

嗣漢作義士傳比之范堯夫

吳燦定襄監生家貧力耕養親已而浚北隄渠十餘里田數十頃比三年榛莽皆爲膏腴至今邑人享其利

牛四達定襄人鬻食於市一日有夫婦來食相向泣詢之知因親老乏養將賣妻以養親故悲耳四達慨然取十金資以歸人多其義

梁毓靈定襄武生幼孤祖溥源有積券千餘金欲焚未果祖沒券亦久失毓靈忽得之喪隙成祖志盡焚之聞者感激李永旺靜樂人邑向苦丁差多有逃亡嘉慶初永旺獨出賃願請當道攤歸地畝

高映泰靜樂人負販爲生道光初於逆旅中拾獲遺金尋歸

其主

以上
忻州

徐鴻儒五臺人性沈毅有武略明季土匪蠭起散家財修堡寨糾村人保守姜瓖之變代州劉遷聚眾應之縣人高山亦據險劫掠鴻儒塞要隘率丁壯堅守宣府總兵李延壽征勦至縣派爲練總鄰村王某陰通賊以計誘擒斬之解散其黨旣而賊以大衆迭攻鴻儒隨機堵禦相持數月賊卒不能破會延壽以大軍至皆敗走時五臺各村堡賊所過成墟獨鴻儒且耕且戰所居建安村屹然爲南路保障賊平縣令董因名村曰保安以旌其功其後歲屢饑輒出粟活眾淳沱水漲人艱於涉秋冬駕木橋並養水夫以送渡鄉人共建碑頌之張向嶧縣諸生順治初土寇四起有興嵐婦女數十被掠到嶧珣侯賊他出悉收養之日給薪米訪得其家盡歸之子夢龍亦好施嘗建陽武河橋以便行旅

張宗舜，崞縣武生。順治初，土寇姚采華者據東山，時出劫掠。宗舜率鄉團直搗賊巢，擒斬之餘黨盡降。縣令路萬化上其功，授守備銜。

劉孔璧，繁峙人。劉遷之亂，城陷，縣令崔尙賢全家焚死，遺一幼女。其老僕攜以相託，家人難之。孔璧奮然曰：「城且不保，賊來家破，無此女亦破，豈得獨生乎？」竟藏於家事，定資送還里。上官旌其義。

黃毓松，代州人。天性孝友，親族貧乏者收養於家。田產或被侵盜，皆置不校。里中有竊其物者，事發送物還，竟弗認也。一時稱長者。子甲舉於鄉。

賈昂，崞縣人。康熙十九年饑，與弟星各出米助賑。復設立義倉，歲出穀三十石以貸貧乏者。

馮國琛崞縣恩貢家不中貲而好施予先世積逋不能償者悉焚其券尤篤於宗族遇婚葬必竭力資助公產租賦恆獨力輸之粟秀莠者事親孝居鄉扶危濟急亦著義聲

賀海晏崞縣歲貢縣丞某以木笥寄其家值亂笥物盡失偶移笥訝其重傾之則複底中塞以敗絮得三百餘金時丞已卒白之官召其子至悉還之

狄從周崞縣人甯武楊光祖宦於楚延爲記室吳逆警逼楊誓以死殉託其二子焉從周攜以去轉徙兵火間護持甚力及安親王至款軍門以光祖死事上聞王嘉獎之其後二子由武功官至提鎮感其義爲樹碑故里從周年九十乃卒王護國繁峙人耕牧爲業有鬻技者夫婦寓其里積十餘金婦常懷之一日婦來求火遺金門前護國自外歸拾之持以

白母母驚曰此必某婦適來取火所失其夫悍今不見金婦無生理護國急往則婦方號泣欲死里人環室相勸護國出金帛之徑去王嘉友村農也亦以拾還遺金稱義

賈成玉代州人嘗建橋通衢並設茶亭偶於逆旅失金七百懼累其主竟不言諸生喬全亦好施給有少年子失金急欲覓死全如數以帛送歸其家峪河漲發久爲村患築石隄障之

張國維代州人乾隆庚辰舉於鄉事親克孝歲饑有鬻媳度荒者出金贖歸之於城北施漏澤二所掩骼並棲旅櫬李青雲代州諸生與州民郭登仕並嘗拾還遺金

李廷仕代州人家世農產足自給而歲必樽節所入以濟村之貧者羣稱李善人乾隆乙巳夏大雨山潦漲溢所居村陷

山西通志卷一百四十四 事行錄下
爲浸廬舍盡圯獨其家無恙先是康熙中其村民有李莅民
者嘗以時平治道途夏茶冬湯以濟行旅至廷仕歷百餘年
相承不廢蓋世多賢云

祁丕昭代州人母楊氏喜施乾隆丙午饑以母命持粟三百
餘石助官賑濟並製槽櫓以瘞道殣

郎廷勛代州人內行純摯與人交未嘗有忤色周急佐乏無
少吝里中任氏生女雙瞽棄之持歸乳哺至長爲擇配遭嫁
所嫁瞽女凡三人皆資之成家育子孫於窮賡尤加意周恤
多有賴以完帑獲與旌揚者子長卿歲貢能承其志亦以好
施聞

朱名生五臺人性愿慤好善邑中險徑如西峩嶺黑山關諸
處皆鑿平其阻行旅惠之

胡成崙縣人少孤貧傭於賀氏三十餘年賀沒家漸陵替遺孤二熒熒無依成行泣嚮紙奉之既爲授室克自立乃別傭於他姓而歲時猶攜榼觴哭奠賀墓弗衰

張述祖崙縣人嘗道拾百金訪還其人又武舉張拱及縣民鄭吉元皆以還遺金稱義

丁珏崙縣人乾隆間歲饑出粟賑其鄉里同縣監生郭定城嘗焚逋券數千金趙應學推產讓弟鑿山通道與亢履和並以輕財尙義推於時

柴茂枝繁時人道拾遺金訪知送還建義峪石橋開寺灣山徑行人至今頌之

王懷德代州人耆德爲鄉里推重嘉慶壬申歲歉出粟數十石助賑道光壬辰復繼之有肆已息業負錢者累累悉取簿

籍焚之所失數千緡不卹也貢生王嘉孚嘉慶中所居村大水力拯災溺賴以存活者數十家

王廷梅代州附貢族鄰有貧不能婚葬者必資助之歲歉出粟徧貸村無饑人子璜官聞喜訓導

李朝臣五臺人嘉慶中武舉性慈好施道光壬辰歲祲出儲粟賑饑一鄉無流亡者善醫廣施藥餌五十年不懈

邢恆謙崞縣貢生所居原平鎮本漢舊縣號衝劇恆謙管興社學鷺輿梁凡有義舉皆倡爲之道光中以孝義旌子之藩貢生亦有父風

邢汝舟崞縣人以優貢授永濟訓導弟汝楫廩貢工書畫司訓汾陽在職並有賢聲家素裕兄弟皆以好施聞嘉慶壬申歲祲出粟賑饑全活甚衆

劉臻代州諸生墾田塞外因之致富道光己亥歲歉出粟數百石戶餽之自是每歲佃租所入必別儲粟若干石以濟貧乏塞外村聚亦多仿其規者至今荒磧遂成樂土從弟埔附貢亦以好施稱又州人王大鵬王廷相並起家塞外篤於鄉誼一時欽爲耆德云

張用永代州諸生道光壬辰歲荒出粟三百餘石賑饑趙證貢生亦嘗賑其鄉里同時諸生李秀山馮德銘均以學行爲鄉人推重恤貧濟困甚有風義

張映淮代州人家素貧道得遺金走訪還之張萬庫農家子也與州人劉永善郎輔康並以還金稱義

賈秉衡代州人家饒於財州有大役必力程其事所居陽明堡濱河道渚沮車摧馬踣行者苦之秉衡歲募人累石駕橋

數十年不懈同治丁卯夏山潦暴漲堡外居民漂沒數十家
老幼零丁無依爲計口授食及冬皆使得所性恂謹淡於進
取屢以輸餉得獎積階員外郎卒不仕閭靜室垂簾鼓琴終
日不聞履聲客至則殷勤款接如恐不及遠近欽其風範
王升五臺歲貢道光中歲屢歉出粟倡賑村無饑人家不豐
而喜推解嫻鄰有急難身任不辭子丕顯舉乙酉鄉試第一
趙春榮貢生趙京武武生並崞縣人急公尙義京武子卜年
萬年並好施每遇歲歉必出粟賑饑

李福春崞縣人賈於塞外道光中屢輸資助賑光緒丁丑復
繼之又馮鹿鳴者壬辰歲饑設法拯濟力保鄉里鄰村有鬻
妻者贖還之

鄧克明繁峙諸生其子彬嘗道拾遺鏹驗其封識知爲邑人

某所遺立遣其子送還之

侯安義繁峙諸生中年喪妻以有子遂不復娶村人孔某負其錢六百緡某病自度不起屬妻子賣產以償安義聞而惻然往候其疾取券面焚之人以爲難

張振麟侯國選並繁峙諸生道光壬辰歲饑與縣人郭世魁

鄭文錦陳光耀各出粟散給其村

以上代州

張成儒河曲人嘗獲遺金呈於官訪還之

王培基河曲人康熙中歲貢好施親族中侍以舉火者嘗數十家年饑振貸不取償將卒出借券悉焚之

魯體祚河曲瞽者習星卜嘗挾術遊陝至府谷遇有因貧鬻妻者泣別甚哀惻然出貲贖之在榆林時持錢易銀主肆者多付十金歸而審其誤立至肆還之

楊喬瀛河曲歲貢性抗直有氣概遇事敢任雍正間大吏競言開墾升科縣令張奉嚴檄不敢抗喬瀛具揭陳情令據以覆事乃止鄰婦王氏早孀有謀奪其志者婦持刀自衛以死誓喬瀛義之力爲護持卒得以完節旌嘗纂修志乘經理廟學廉勤公允持正不阿人以爲有古君子風

張登雲河曲賈人也信義爲同輩所推好施予貧不能婚葬者傾囊助之予德濟監生亦有行誼李功立者墾田蒙古客民皆倚以爲生慷慨負義氣旣沒而人思不忘

鄔崇德河曲監生孝事孀母嘉慶壬申歲饑施米百餘石周良璧河曲諸生事親以孝聞嘗赴試路拾遺金覓還其人王栝保德人道光中副貢性剛方有膽略回匪之亂倡興團練聞警慷慨臨戎不避艱苦州人倚以爲固精於術數之學

著有觀察輯要

以上保德州

李琮生其先同州人宦解州遂家運城世理鹽莢琮生繼其業條陳鹺務多所裨益有謀割地梗鹽法者拉蘆商構訟琮生赴闕上書竟直其事

解錫祉解州人康熙辛卯舉於鄉天性肫摯篤於孝友家貧淡泊慷慨好義州守議建書院竭家資助成之

霍重光解州人授職經歷康熙癸巳歲歉出粟百石以濟貧乏杜克勤亦於辛丑賑饑其子于泗于漳並喜調鄰里散麥貸穀無吝色

劉雲顯解州人好施里民有催賦而失鏹者惟欲自盡雲顯貸以已金又嘗贖回貧人鬻女且結以粟年八十無疾卒

馬宗文解州歲貢好學敦義古誼可風宋緝聲建試院及賓

興會嘉惠士林李肅者家無儋石而喜趨人急州人爲刊碑志其義行

張翎安邑人敦孝友好施濟雍正乙卯夏無麥官平糴不繼出麥數百石以佐之人感其惠

王九韶安邑歲貢輕財好施嘗路拾百餘金待其主還之周卹匱乏多不計償鄉人爲之語曰貢士在可依賴貢士死誰借貸

李積夏縣人康熙己未武進士累官廣東都司所至咸著幹略告歸居鄉謙雅如初值歲歉蠲佃租數百石更振貸其貧乏鄉里欽服

張楫夏縣武舉少孤事叔孝謹嘗再拾遺金皆訪還其人大學生馬巒以峭直爲同輩所忌適遭家難被誣陷獄縣人皆

知其冤而莫能援也值河東久旱楫以清滯獄召祥和爲言率同里王敏等數百人代求申雪不避利害時論重之祀忠義祠

張文紹夏縣人以貢任清源教諭母老乞養歸歲歉出粟以賑鄉人多之

員鼎甲平陸諸生性友愛撫孤姪曲盡恩誼睦鄰釋爭不苟然諾

令狐種平陸人村有洪澗病涉每歲修橋以利行人子孫五世踵行不怠又曹勝捐貲架橋城東澗水上趙廣趙萬程俱平道修橋散粟濟困

張志尹芮城監生康熙十四年捐粟三千石協濟陝甘平治通秦大道三十里又嘗鑿井建橋施茶粥焉

張冠玉芮城貢生事親克孝康熙壬申大疫施棺不繼復捐
葦席五百以瘞死者

馬貽端解州廩貢躬行純篤遠近皆稱善人事親孝族中子
弟有可造者必資以膏火勸令讀書每歲歉出粟減價平糶
與人和藹終身無怨色嘗有無賴登門尋冒餽以茶繼餉以
食其人感泣遂自此改行其盛德服人如此

李養生解州監生道獲重金訪知爲祁人所遺送還之先是
其祖有還金事養生繼武人樂道之

劉希周解州諸生性孝友歲歉散粟濟貧

張守謙解州人生有雅量與人無競里有盜伐其樹者遇而
不問更餽以炭其人慚感由是改行

展夢麟解州人嘗夜獲一騎發其裝凡數百金次日坐道口

以待訪者俄其人至詰所失物數皆符立與之

張文驥解州人以縣丞注選意氣慷慨縣人多感其惠貢生馬猶彪諸生姚受是劉百孝監生胡吉相及張成範高好謙李行買士英俱以好義稱

王善繼解州人以貢授潞安訓導乞病歸乾隆己巳歲荒散粟百餘石以周貧乏嘗捐修祠宇助建解梁書院設義學置田以供膏火貢生雷傳道者亦以父潛遺命割腴產爲書院經費

王肫解州例貢乾隆十三年大饑盡出積粟保全鄰里

張岷安邑人雍正丙午舉於鄉居家孝友義重任恤嘗與修邑乘

柴崑安邑人孝事孀母友愛諸弟乾隆己卯大水出金五百

以拯被災者一時名宿多爲文以記之

張士翠夏縣人乾隆壬子武舉慷慨好義邑中大舉有關文教風化者多所倡始有司奏獎蒙

賜樂善不倦額

柴從矩平陸人乾隆己卯舉於鄉歲出粟散給親族年饑輒減價平糶趨人之急常如不及性嗜學藏書甲於一邑柴溥丙午舉人亦喜施予嘉慶丙寅歲祲設粥廠以食餓者

馬玉一芮城監生乾隆壬申歲歉輸麥二百石賑貧同時柳大綸亦輸穀二百石助設義倉

張鵬翼芮城人乾隆末年歲饑捐粟千餘石分給隣里嘉慶九年遇荒復捐賑如前

李英敏芮城諸生路拾遺金訪得失者還之又監生李效孔

縣民蕭允帝並以還金事嘖嘖人口

王者佐芮城諸生孝事繼母推產讓弟嘗買妾已成券矣瀕行見其母女泣別惻然舍去以身值予之

趙冬旦解州人嘉慶戊午舉於鄉多善行親族貧乏嘗以館金周之主講書院造就甚衆次孫德輶由進士官至江蘇巡撫

劉鳳池解州諸生敦篤有氣節嘗赴鄉試途中遇友病劇留止逆旅延醫調治及友愈三場已罷矣坦然不措意

侯王臣解州監生好義樂施歲荒計口授粟不復責償村南當東西通衢道汙下王臣以時平治別構地以擴其道衆爲立石志德

侯志公解州監生嘗割腴田充義學經費村人借倉穀貧不

能償者恆爲代輸州守區旌其義

楊載溶安邑人由諸生授詹事府主簿事親以孝聞急公好義嘉慶中文昌初入祀典廟制未備立出資營建造橋通道義舉甚多子篤恭亦善事親捐修義倉克繼先志

衛國才安邑人歲荒兩次賑饑惠洽閭里李珣性喜周急遇有稱貸從不責償生四子皆貴顯

柴毓英安邑監生敦篤內行慷慨好義里有孀婦因貧改醮已受聘矣令家人造其廬諭以大義償如其值婦感泣矢節終身又增生柴清漣居鄉亦以利濟著稱

惠萬紀安邑武生授職都司性孝友樂施濟道光丙午丁未歲薦饑出金散粟以周貧乏

惠于宗安邑增生內行純摯道光丙午大祲出粟賑濟鄉黨

存活數百人生平全矯節救溺女捐棺施藥諸多義舉同時從九牛篤恭輸粟二百石助賑設粥宗祠以食族黨耆民姚文煥賑粟百石並施縣衣鄉里咸推爲盛德

張秉善安邑監生道拾千金訪知爲某商所遺如數歸之楊如蘭安邑人以孝友稱經理義倉出內維謹歉歲賴以有濟咸豐初由舉人擢孝廉方正官通江令有政聲

張溯源安邑歲貢篤於內行教授鄉里甚有聲譽修脯所入輒分給羣從里人趙某貧病將罄其妻解囊資助遂獲完聚張仲彪夏縣諸生家居教授踐履純篤生平與人無爭有吳某者嘗過其館偶失紫金誣爲仲彪所匿子姪欲與爭辨仲彪止之與衣以償某尋得原金踵門謝過笑遣之其厚德多類此

鄭玉乾夏縣人幼鞠於叔母及長事之如所生居家雍睦篤於宗族立祠堂祭田有貧不能葬者具棺以瘞無子者擇族人嗣之邑中興作有關文教者必力任之素善醫用藥不多而常中病其言曰藥猶兵也兵貴精不貴多論者以爲知言柴居善夏縣監生性孝友學粹品端聲望所孚閭里式化置祭田創社學見義必爲嘉慶甲子道光丙午兩次救荒代輸錢糧閭里多被惠祀孝義祠

張述昌夏縣人行義爲鄉里推重祀孝義祠

吳昌東夏縣諸生敦孝義重然諸友人高某死遺一女貧不能葬昌殯之以禮聘女爲子婦迎養高妻令二子母事之樊某者爲債所窘將自盡爲出金代償歲餓復貽以粟無德色史鉞平陸人授職州同謙謹好善人稱長者有戚某因子幼

以腴田五百畝寄錢父虛立質券後其子長鉞折券並所入佃租悉還之他行多類此

趙果愼芮城監生質直好義遇親鄰時周其貧乏道光丙午大饑出粟減價平糶里人德之諸生賀鳴金亦有行義偶步田間遇盜已禾者急走避其人追謝不顧而去

朱作聰歲貢淡如玉監生並芮城人嘉慶癸酉俱出麥粟賑饑其後道光乙未丙午歲歉作聰子理問凌雲如玉子諸生盈科並捐賑如前而凌雲子之儒於咸豐間復繼賑縣令丁皆給匾旌其世德

劉邦杰芮城人五世同堂性喜周急貧者悉焚券不令償

陳鴻緒芮城人以州同注選祖遇泰父典政並好施子道光丁未歲荒鴻緒盡蠲佃租復出麥六十餘石徧餼村人

劉重仁芮城人丁未歲荒賑麥百餘石鄉人勒石頌之同時
監生杜昇東亦兩次散粟周其鄉里從九杜喬鶴出穀平糶
佃租積負八百餘石悉除之從兄喬齡授職照磨嘗創修節
孝祠並著義聲

李法章芮城人傭工奉母母病股常負背出入時外遊以娛
志中年家稍裕好施遇義舉解囊無吝色子旭好善有父風
居近河水漲有漂尸必棺斂以葬二十餘年無少懈

郭文燧安邑人家七世同居雍睦無間遇親族貧苦者量力
周恤倡修節孝祠並通惠橋一時稱義舉

姚汝均安邑恩貢行誼爲鄉里推重村人子弟多因貧廢讀
設義學捐千餘金優餼之同治初舉孝廉方正

葛宗鄉安邑人咸豐己未進士授刑部主事以母老乞養歸

居家雍睦篤於宗族時周其匱乏興復書院津逮後進鄉里咸推重焉

朱春林商學諸生性喜周急同治己卯大疫施藥餌捨棺槨孜孜不倦嘗刻楊忠愍公家訓設茅津渡救生船遠近稱之劉智顯平陸人築橋通道以便行旅一生賑貧恤孤鄉里咸敬重之

梁秉智高向垣趙廷堯王太平並平陸人俱以拾遺遺金稱義

令狐增憲平陸人慷慨急公咸豐中軍興倡結鄉團同治丙辰擒匪竄陝集沿河丁壯更番防禦勞苦備至縣人倚以爲固

王夢奎萬城人由舉人任太平訓導好學敦行有人師經師

之稱咸豐丁巳河南寇警倡興團練以衛鄉里當道咸推重之

張勉義芮城諸生同治初陝回之變沿河亡者尸骸狼藉捐資拾瘞至三百餘具六年歲歉出麥穀八十餘石以濟鄉里

其他義行多類此

以上解州

楊本篤絳州諸生事親以孝聞順治初土寇攻城從同知徐祚煥竭力守禦寇乃遁城東南頻受水患本篤捐金多方疏鑿居民始無沮洳之憂

陳顯字絳州人慷慨有志節幼善泗水姜瓖之變土寇圍城顯宇奮身從水門出潛汾水中行數十里往平陽請兵殺賊城賴以安

張根樸聞喜人明季受知於袁臨侯學使補諸生袁爲直指

張孫振誣劾詞連根樸逮京會鞠抗辯不屈試書義立就詞
義兼美鞠者賞之以是直袁削孫振籍時年甫十五一時京
朝官及諸名士皆引重自是感憤棄舉子業不復應試所交
者皆當世砥節士好讀史與曲沃衛蒿善論學相資教子姪
以立品爲先年踰八十卒子克疑見鄉賢

任賢河津人明時以薦特典崇禎己卯貢舉順治三年部檄
以通判用辭以疾當事者迫之行中途臥病不起放還家居
曳阜矜淡泊自安尋卒子及尹諸生篤學尙義父卒積券盈
篋值拜掃焚之墓前後有來償者皆以無券卻之

李自美絳縣人由副貢任瑞州府通判府屬浮糧十餘萬久
爲民累力請於上官得題豁民頌之及歸襁被而行囊橐蕭
然康熙壬申歲饑罄資賑鄉里至鬻產以給又捐地設義冢

縣人稱道其事不衰

陳禔媯絳縣廩生事母孝順治初土寇未靖率村人結團嚴備寇不敢犯歲饑煮粥施米以賑貧乏子雷交諸生有義稱喬廷楫垣曲諸生順治初寇孽未靖築堡防守一鄉賴以保全撫孤姪曲盡恩誼人皆義之

閻雋絳州人少讀書尋以事廢事父母孝家人謀析居涕泣者凡數日課子甚嚴嘗建宋五子祠立嬰鳴社垂沒猶區畫社倉且以屬其子云

王家琮絳州諸生居鄉號公正舊例歲報富民凡上官公應悉資之琮力請於州守弊遂除

段世慶絳州諸生孝友好義卒祀鄉賢世雲其族也建汾水橋並設經費子孫踵行弗衰

吳偉絳州諸生建義學設學田又置產課租備完族人道賦以義稱楊擅者亦起學鄉社割腴產優其館餼王大令震亨有碑記

儀兆義絳州人與弟兆祥析居分已產倍給之解囊恤貧嘗焚遺券以耆壽終

翟垣間喜人以孝友著建義學延師授餐以訓後進康熙辛未歲荒租入千斛罄以賑粥由舉人令太平禁止溺女習俗稍變

楊榮聞喜人以父永甯蔭官興化同知遷守馬湖解組歸辛未歲祲出米賑粥復給戚里麥穀數百石弛窮民田租五千石又捐千金築城垣俾丁壯得傭工自給遠近德之

甯鼎軾聞喜人由副貢厯官岳州府同知艱歸遂不復出縣

南喬寺渠隔澗引水入壤鼎軾相地勢穴石通流灌漑所及皆成沃壤性好施與村人柴付宗等鬻身於旗下憫之出金贖歸里民應差者率散居每失期會因於城中建屋數十椽以棲之事至一呼而集咸稱頌焉

段起龍稷山人性樂施濟康熙壬申歲荒捐粟三百石賑濟同時族人段生芬平定訓導段克肖並出銀米以濟又縣民楊修德諸生馬逢皋皆竭資盡儲保其鄉里

楊挺生稷山廩生王申歲歉賑粟千石全活甚多創立社學延請名師遠近附學者踵相接膏火之資獨力供辦義聲丕著而監生張葵於戊寅歲焚積券二千餘金一時稱爲豪舉張錦鳳河津人事母方以孝聞母冬月病思魚既有饋魚者胥謂孝感築神峪石隄瀦水溉村中田數十頃開炭北山

見明季枯骨萬計潸然曰此無主吾見之卽其主也斂爲巨冢一時推其義

張超著河津人康熙庚午舉於鄉少孤事母孝性慷慨多大節丁丑土寇郝天恩等犯縣城率里民剿滅之庚子歲被破產賑饑鄉里頌之選陽城教諭未仕卒

王繼虞河津人敦倫重義家析爨後姪輩有爭產者責以大義割己所分者予之先是其祖秉衡通判河間一時投契爲奴者甚夥後家人偶檢文券得原契數紙亟戒勿視藝之曰此輩有同鄉里者知其名何以相處其仁厚如此

張攀桂河津人王申舉於鄉性廉介嘗自都中歸父執吳相國襄贈以所書扇十餘柄曰厯某某署投贈可充資斧攀桂攜歸竟不一致人嘗館洪洞主人欲厚贈之而弗敢獻陰實

諸行裝見之仍寄還

任桐河津監生歲饑散粟賑貧於族里時濟其匱乏每歲除懷碎金以待急者居親喪以毀卒聞者哀之送葬至千餘人張贈河津諸生辛未饑煮粥救貧施粟三百石卒年八十

張鵬程河津增生事母孝辛丑大饑與弟貢生雲程賑穀數百石同時例貢許寄佐亦輸金助賑倡設義倉縣民段昶許珮及昶子鏘鏡並以助賑爲當事所旌

柴之棕絳縣諸生好義樂施修平通翼山路及沃邑交裏橋梁魯峪孔道費金粟以數百計子帝蔭亦有父風

王積業絳縣人豪俠好施拾還遺金又王淵郭恩賜祁國英亦以還金稱義

任珩絳縣諸生事繼母以孝閏辛未歲大饑珩出粟煮粥全

活甚多平居周急濟困孜孜不倦又貢生史宗逸亦出粟遍賑尤善處鄉黨村人多化其行無爭訟者三十餘年

曹際烈絳縣監生與弟友愛備至康熙辛丑歲大荒出粟三百餘石以贍鄉里又設廠煮粥以食餓者積逋券八百餘金悉焚之未嘗有德色焉同時監生賈由聖亦散粟施米又倡捐義倉穀二百石其事繼母撫弱弟亦爲鄉黨所稱

范加玉絳縣人居家孝友見義必爲比隣張耀久出不歸其母與弟欲嫁其妻妻泣將自盡加玉聞之典衣得金僞作耀書轉致其家云耀在某處並約歸期後年餘耀果歸夫婦由是完聚

賈從聖絳縣人辛丑大疫賑饑焚券人咸感之子凝禱貢生亦喜利濟精於醫貴賤一視之貧者更資以藥餌已卯歲饑

周恤族里賴以舉火者常數十家當道扁旌其門

席如宴垣曲人性剛直好義族黨貧不能葬及不能供徭賦者傾資貸之從不責償邑令旌其門

王道泰垣曲人歲饑煮粥活人以耆德稱

謝浩絳州人友愛聞於鄉里朋人之急貧無償輒焚券弟儒爲州掾屢代里人完逋賦膏有義稱

梁勝選絳州人嘗路拾千金榜諸通衢待其主至還之梁吉公亦以訪還遺金稱義

王企鳳絳州耆民雍正乙巳出粟賑饑村中賴以全活者三百餘人王大任亦賑其鄉里州守並旌之

黃嵎齡絳州監生家世好施乾隆辛卯歲荒糴米遍餽村人百有餘家悉賴以存活

景世賡稷山人雍正中兩次賑饑並施籽種鄉人德之

杜杉稷山人授職布經厯事親孝外祖父客河南久無耗體
母志遍訪至通許得骸骨負歸族有債累致疾者爲代償之
乾隆壬子出粟賑饑嘉慶甲子乙丑歲祲賑如前鄉人立石
銘其德

王世傑稷山人嘗道拾八百金訪爲陝人所遺還之

張永源稷山人乾隆己卯歲歉出粟散給鄉里子貢生煇然
亦於嘉慶乙丑賑饑同縣監生段執中段登魁及原天福並
以賑饑焚券稱義

師惠遠河津人乾隆中歲荒出粟三百餘石散給村人

呂斌盛河津人道拾八百金訪其人還之

趙鴻衢河津人孝事父母敦睦族鄰有宗人攜家僑居他省

墓田爲耕者侵削鴻衢以已田易而封崇之歲時祭歸爲常
中州饑有孤兒乞食詢知爲故家子收養之長齋金遣歸
晉允河津人事親以孝聞乾隆乙卯戊戌兩次賑饑出金修
紫金山路及傍河梯子崖疏鑿幽險費皆不貲行人惠之
崔宗本河津人與弟宗周皆樂施子乾隆甲辰丙子兩遭荒
歉出錢粟以濟貧乏嘉慶甲子旱饑復繼之時饑民洶洶謀
強劫里人曰此義門也不可乃止未幾宗盡發所儲計口授
食皆感悅拜受而去

侯一彪河津人乾隆丁酉歲歉及從子監生履中出粟數百
石遍賑鄉里及王子大饑子時中復賑兼施錢米取逋券悉
焚之孫永錫授職理問承其先緒亦於嘉慶乙丑丙寅設法
繼賑力保其里人稱爲義門

胡殿魁河津人敦倫尚義里黨有以匱乏爲言必量力以給
遇歉歲盡火其券復出粟貸之又監生張作楫事親孝恤貧
助葬有麥舟風

賈連葉絳縣人事親克孝居家敦雍睦當歲歉出粟散金澤
及鄉里嘗捐義倉穀五百餘石以備荒歉邑令旌之

亢吉祥絳縣人乾隆間歲饑賑濟同里縣人曹德達亦以賑
饑稱義

張儒正垣曲貢生乾隆中輸金修風山口路又嘗倡修城垣
當事以急公奏請議敘

普上悅垣曲恩貢賞設家塾宗祠臚列訓規於石歲時會族
人講說乾隆王子大饑出穀數十石保全合族人傳頌焉

文學孔垣曲增生居家孝友治渠灌田出粟濟貧鄉鄰感激

邑令湯扁旌之又馬銘亦以賑饑爲官所旌郭聖功魯其清並諸生與縣人王桴胥以睦族恤鄰見推里黨

唐必選絳州附貢嘉慶甲子乙丑薦饑出資糴米散給鄉里同時賈德馥亦出粟助賑鄉人賴以全活者甚衆

喬峯雲聞喜人授職提舉嘉慶中薦饑賑粟百石兼設粥廠生平扶危濟困不吝推解義舉甚多縣南數村爭水利訟歷世不息峯雲爲之畫界設橋均帖服子作新官霸州知州以廉惠稱

劉可臨聞喜人性長厚其佃人獲盜禾者令急釋之並囑勿揚其名嘉慶乙丑大饑賑粟施金惠洽鄉里

季林蔚稷山人事親以孝聞家僅中貲而趨人之急傾囊未嘗少吝嘉慶十年大饑遇販陶器者道路器盡破伏地而泣

詢知其母老家方斷炊爲計器予值並飲以粟里人某素與有隙某病劇醫至以其貧慳不與藥林蔚語醫但瘳之吾代償汝或問故曰吾自拯病者耳他何計焉其長厚多類此閭懷珍稷山人嗜學於宋儒書身體力行中年喪偶終身不娶尤篤友誼傾囊周急從無德色

趙爾熾絳縣監生嘉慶間歲饑出粟徧給村人隨焚其籍同時王步雲亦以賑粟焚券並著義聲

柴思誠絳縣人嘉慶初以輸餉議敘州判性篤厚勇於行義乙丑連遭荒旱傾囊糴粟計口授食事竣焚其券邑宰額其門以旌之

陳崙觀絳縣人授職州同事繼母恪奉子職嘉慶間歲薦饑捐米數百石徧施鄉里

賈宗洛絳縣人山東鹽運司運同致仕歸凡邑有大興作如
文廟姜嫄祠考院書院皆倡爲之至今嘖嘖人口

安吉雲垣曲人性介嘉慶十年大饑無可謀生穿一土墻置
席橫木而縊

倪世俊垣曲貢生性好施予有貧者不期其償積久並券焚
之縣北往絳邑踰貫子嶺路甚險輸租數石每歲修治以利
行人

楊輝祖垣曲監生遇歲歉散粟濟貧子振秀克紹其志閭里
頌之

文暉垣曲舉人性仁慈喜恤貧乏嘉慶中嘗賑饑每冬備縣
衣給乞食者友愛兄弟訓迪子姪沒之前三日整公服冠帶
入廟焚香無疾而逝人疑先知云

趙學曾絳州人家貧嗜學行誼孚於鄉里遇有爭訟得一言立息鄰有不肖子爲人所執皇然曰責罰惟命乞無令趙先生知否則惟有死耳衆釋之遂改行爲善時比之王彥方云郝天年絳州人少失怙事母至孝家貧無能就傅每過鄉塾竊聽歸輒成誦服賈蘭皋暇輒手一編晚有悟於居敬之旨每日正衣冠危坐閭閻中無貴賤賢愚咸以郝夫子稱之生平喜喫虧而不肯置人於不義嘗言喫虧亦須學也有鄉人爲債迫幾死出五百金代償家戶敦睦族鄰置祭田建義學朔望集鄉人講

聖諭遇有義舉必竭力資助州牧重其人舉充奎文閣典籍卒

衛秀峯高允升並絳州人道光己亥於其里倡立養士養濟

二會歲以其息爲士子應試之資並濟窮民其後州人建書院秀峯子如圭允升子舒文復力程其事

喬佐洲絳州人家居好施給道光間以輸賑

欽賜舉人嘗校刻党冰壑全書及王定九所纂六字箴言以示嚮往歷官兵部員外郎進戶部郎中乞歸卒

家必振絳州人授職干總道光丙午歲歉出金糴粟以濟鄉里同時高書升衛青峯亦各出資倡賑咸豐庚申饑復賑如前

張其籍絳州監生事繼母以孝聞急公尚義道光末興修廟學多資其力州書院本西人教堂雍正中奉文改建者咸豐季年中外議和以故地繳還西人士林憾焉其籍乃倡議以修學餘金別購地卽日庀工院成規制宏敞更踰於舊其見

義勇爲類如此年七十七卒

賈選紳聞喜人授職中書嘗獨力修涑水石隄及廣濟橋子履中教諭以賑饑稱義

監生趙肯堂楊子明裴巡聖並聞喜人均以焚券著義聲甯春榮聞喜諸生道光丙午出粟助賑代完里人二歲逋賦又仇採香倡修村堡設法賑饑

楊逢泰聞喜貢生官待詔鄉居每爲人排難解紛恤災救患丙午歲歉與弟逢時計口授粟並給麥種全活甚衆家五世同爨舊賈於秦僮客虧損母貲卽取券焚之人稱厚德

柴文理河津人孝事繼母待異母弟恩誼周至家僅中貲而慷慨好義鄰里有不能婚葬者必極力伙助道光中倡修書院增置膏火規畫久遠士林惠之

山西通志卷一百四十四 孝友
原永鶴河津監生少孤事母至孝嘉慶道光間兩次賑饑里有以貧鬻妻者予以金俾夫婦復合子維揚善醫丙午歲祲出金佐賑維昌廩貢維善州同並敦孝友恤貧濟困

柴逢年河津人事親以孝聞居鄉多義舉遇事關文教尤樂倡始道光丙申歲歉輸粟濟貧丙午大祲復竭力以賑嘗以照磨署周施令有廉惠稱

柴星燦河津人授職理問孝事孀母歲饑施錢散粟周恤同里

薛萬祿河津人以理問注選敦篤孝友焚券還金懿行丕著子慶麟善醫嘗施藥濟人丙午歲歉出資濟困龍門以北山徑奇險修之以利行旅

阮應學河津人嘗泛舟秦晉間嘉慶初教匪竄陝虛其舟以

濟難民不責值也子某能承其志散粟救饑里人勒石表之
楊丕建河津監生事親以孝聞昆弟皓首同居里黨有貨不
復責償歲久輒焚其券暑月恒設茶通衢以濟渴者

衛爾珍河津人事繼母盡孝路拾遺金待失者至還之

周國郎河津人授職都司急公尙義廟學書院皆所倡修嘗
過市見鬻中說版者集資贖之以歸王氏子孫歲饑出錢粟
以濟鄉里其於禹門創設救生船尤爲人所稱頌子景豐景
星皆克承其志道光丙午歲歉出錢糴粟賑救甚力

衛仁慶河津人與子觀光德光並以賑饑稱義又監生衛聯
捷嘗焚借券數千金

阮淩雲河津人內行肫摯平居排難解紛意氣爲鄉里推重
同治初陝回倡亂沿河戒嚴設團防躬爲督率布置有條衆

恃以無恐

普昀垣曲諸生道光丁酉賑饑焚勞力恤佃農李鳳集例貢亦於丁未災歲設粥廠全活多人

趙洽垣曲貢生家僅中貲嗜義若渴修築村堡浚治橋梁道塗雖數月終年之役從無倦色又從九楊輟居鄉有行誼排難解紛其村無爭訟者數十年

仇嘉謨聞喜人授職提舉鄉居敦禮讓修橋濟人散粟救饑行之無倦亦無德色弟一德有才武丁卯寇警躬緝守禦具部勒其子弟結寨爲固衆恃以無恐時有劉迎祉者亦於其所居出金築堡一時壯之

王九要稷山人捻匪入境偕里中丁壯持械力禦負重傷幾死不爲賊屈同時附貢王天祥亦據寨固守鄰村效之一方

獲安

賀文元稷山人力田起家諸弟久析皆蕩其產復要與合爨歲歉里人乏食罄所積粟分給之無德色

曹立楷稷山人篤學有德誼鄰婦生女棄之田見之惻然抱歸爲募乳媪撫字之家居教授持躬端謹未嘗輕履縣庭同治丁卯捻逆犯境倡修保安堡以資捍衛又懲蠹役之擾立鄉約勒石村中以彌其害里人賴之著有家訓輯要

姚紀稷山人戶部郎中鄉居值捻逆亂後懲前事出重資倡修高歡寨置守禦具鄉人恃爲保障歲歉時疫設粥廠施藥餌孜孜不倦中年不祿聞者惜之

王培峰稷山人授職理問事親克孝性質直好施給親黨匱乏量爲贖恤有以八百金來宿者比旦金失所在出囊中鏹

如數還之未幾得盜乃素識也檢原物虧百餘金聽其緩償竟不置理人以雅度稱之

周世禮絳縣附貢授職布政司經歷家中貲而好施咸豐丙辰歲歉出粟賑鄰里不足糴於市以繼之後逢荒禱遂以爲常戚友婚葬多賴其力以濟邑有周善人之稱

劉濟之垣曲諸生性剛直拾人遺金還之弟潤之已分爨值荒歲得先人瘞金數百請兄至同取濟之念弟艱飭多推子焉鄰里悅服

成希賢垣曲監生父登第好周貧乏咸豐十年歲饑希賢借貸助貧多所全活人稱其克繼父志云

王恒泰垣曲附貢嘗出資於鼓鐘川別開山道以避暴漲置租課爲歲修費行旅便之丁卯寇變率村人築寨固守一鄉

咸欽其義刊石以誌

張萬億垣曲人貧而廉不苟受人一飯光緒三年大饑啟其妻之曠寢於其中而沒又有衛景賢王得堂皆非其力不食恥於營求全家閉門死魯許兵者年甫童計囊盎餘儲僅足母餐投河死

以上絳州

宋斗星隰州人饒智略順治戊子土賊王登憲糾其黨攻州之曩索堡斗星督僮僕暨鄉人捍禦已而賊益衆不能支間道走汾州請兵三百人兼程至賊退據老兒山爲持久計斗星伏兵山側從數人誘賊賊遽出戰鬥斗星死鬪賊將還伏兵起乘之賊遂大亂擒斬無算曩索堡獲無恙

王居中永和人有勇略康熙甲寅賊王祥百餘人攻城邑居中奮力與戰擒其渠張桂陰等賊衆遂潰

張鈐大甯拔貢官臨淮縣丞性慷慨親黨有貧乏者不吝推解父沒所積逋券悉取焚之恥於市德未嘗與人言也劉而介亦拔貢性孝友篤於宗族佃民負租至數百金以貧無償悉蠲之嘗官奉高知縣未一年卽辭歸隱居教授以終庾璧大甯諸生性鯁直尙義嘗出資濟急王楷亦諸生周急恤貧尤篤於親族鄉人欽之

黨崇雅蒲縣吏員康熙辛未歲饑煮粥濟貧州守孔旌其門喬步洲蒲縣人康熙壬寅歲大饑發儲粟自給外咸以濟人賴其舉火者數十村縣令張卒於官厚賻之歸其喪士論義之同縣任加勝者亦於壬寅貸粟佐賑

張柏齡永和人慷慨尙義營建廟學多資其力馬上瀛亦以急公爲鄉里推重

王煥先大甯歲貢與弟榮先克敦友愛父在時有張某以百餘金來寄其家未嘗索及煥先偶檢簿得之時張久死詢其子孫如數與之

馬治平大甯人清潔自好尤重義喜文學嘗輸腴田備書院經費前令藍勒石誌之

劉作梓大甯監生慷慨好施乾隆己卯歲歉出粟散給鄉里縣令谷匾旌之

郭金富大甯人嘗於市拾百金閱數日過酒肆聞有以失金事述於人者立取還之封識宛然

席柱雲蒲縣人以縣民困丁徭變產出貨走愬上官籲請累年至嘉慶癸酉始攤歸地糧民獲安業鄉人爲建坊表德

李枝盛大甯人素多義舉咸豐丙辰出粟賑災鄰近十一村

均感其惠

李有春大甯人鄉居多行誼凡婚葬不給行旅困乏者必量力周恤勤於農功廣畜牛具以助人耕未嘗有德色光緒丁丑大祲散錢粟以救同里並及鄰村未幾卒鄉人哀之

曹倬蒲縣增生有膽勇能任事家不豐而樂施子親黨緩急足恃縣北五鹿山多流民懇種良莠不一有言爲盜藪者上官委員察訪倬力白無他令良民互相保結匪黨無所容皆遠遁捻逆陷吉州鄰邑戒嚴練勇固守持以鎮靜人心乃定其他周急濟困義舉甚多撫軍錫匾旌之

白上坪禾和人周急濟困行誼爲鄉里推重遇有爭訟多就質得數言卽解所居濱大河逆回之變難民東渡多爲營弁所遏上坪力請開渡躬親撫綏賴以逃生者無算

以上
州

劉文廷霍州武生明末土賊肆擾恃山險官軍艱於剿捕文廷深悉形勢要害爲圖持獻軍門遂克奏績賊平當道論功入告文廷曰吾自爲鄉里計耳且親老不願仕也時徭賦繁重民多逃亡每出資獨力支應代完逋賦村人得遂生聚咸頌其德

成文耀霍州貢生康熙己丑歲荒捐賑三百石又代賠里人逋賦一千二百餘金明年招徠鄉隣給資助粟訖無德色子均亦有父風

薛璡霍州貢生事親孝族黨貧窶不能婚葬者助之康熙壬寅當道檄各州縣運米濟陝饑州牧諭派搢紳俱不知所爲璡獨任其事

胡抒忠霍州諸生明季之亂族人多逃有停柩於家數十年

者抒忠悉葬之王寅歲歉煮粥救饑建橋通衢利濟行人
成均霍州監生歲薦饑先後捐粟五百餘石賑之

安修己霍州人撫孤恤寡宗族婚葬資助弗吝辛丑大饑有
汾西民攜妻子鬻州境者捐錢米濟之又廩生李成楨輸粟
賑錢並贖鬻子云

衛全趙城人康熙中歲饑出粟五百石以賑貧乏里人爲勒
石旌義其後有申聰者賑粟千石又賈逢運衛襄緒王效閻
之相均出錢粟保其鄉里

賈栩趙城監生里有婦鬻其子栩聞泣聲爲惻然與以金令
贖歸婦感謝問姓名曰吾非市德者不告而去

楊起麟靈石人撫弟姪有恩置義田若干畝贍族人又出金
取息以資族中老穉貧窮婚喪諸費擇其賢者掌之母族何

氏亦爲捐金營息及里中徭役縣中還應官車各有裁制有
范文正公遺意云

梁天成靈石諸生好周急代族人完差糧者幾二十年兄天
錫天藝亦有行誼又諸生吳業篤於友誼矜孤恤寡丕著義
聲

吳立業靈石人康熙間薦饑出粟施金力保鄉里村人刻石
頌之

陳子壯靈石人嘗捐金生息資族中公費歲歉出粟賑濟至
於散棉衣施茶湯贈藥餌給棺槨諸舉歲恒爲之子葆光官
登州府知府有政聲

梁謙靈石人康熙庚子歲饑出金賑貧每冬施棉衣夏設茶
飲孜孜不倦

成王德霍州廩貢孝友稱於族黨乾隆丁酉出資賑饑戊申又饑賑如前

韓永義霍州人仁厚有長者稱乾隆壬子歲祲里人乏食託散糠爲名而雜粟米以與之其他助婚葬修道路施棺散藥皆出於節儉之餘非素封比也子培深諸生孫班舉於鄉劉大隆趙城監生讀書通大義事親克盡色養族人相爭而傷牛者代償其牛並置酒俾釋憾嘗遇大饑家存粟四十斛以三十斛濟貧乏家人阻之曰吾甯澹泊食疏粥不忍見戚里有餓殍也

喬高趙城監生以焚券稱義張常中授職州同亦有義聲臨沒猶捐書院經費以惠士林

湯焯趙城諸生歲歉出粟貸貧不責其值人曰是賑也非貸

也將爲上壽焯曰於爾爲傷財於吾爲市德奚取焉力卻之
劉誠趙城歲貢少有學行好施予號獨者賜以粟貸貧人金
不責其償性淡泊子體重官湖南數迎養卒不往聚徒講貫
以終

許榮學趙城人乾隆中歲祿爲粥以食餓者月費米百石有
奇不言德也樊紫峯者亦於饑歲輸粟濟人置祭田以敬宗
收族

李純許錡王聰並趙城人歲祿出粟以賑其里而純與錡各
於其村建學舍出膏火助貧子弟讀

徐文光趙城人獨修霍渠滾堰王永康爲石灘村引汾水灌
地二百畝又捐粟開南步莊渠灌地千畝有奇又石明村有
元時故渠久廢監生馬成耆民楊月桂楊元力修復之引汾

水溉田尤廣人皆尸祝之

閩子睿靈石人性狷介婦翁曾以千金贈堅辭不受家畜蹇代步轉售於人方一夕死售者來告立取原值還之

梁採山靈石人乾隆己卯歲饑捐金助賑己亥己酉復賑如前又分給籽種於貧者其他義舉甚多

房福淵靈石人兄弟讓產友愛無間出貲賑貧族補社倉扶危周急鄉黨重之

陳思賢靈石人家居以友愛著每遇歲歉出粟按丁分給待舉火者至二十餘村修葺橋梁平治道路恒爲之不倦

趙晉裔靈石人乾隆間歲歉施米濟貧子永年亦以好義聞王中極靈石人父六駟嘗設義學置義冢建橋梁焚券寬逋施金賑乏中極承先志益恢宏之邑中橋梁道路多所修治

羣以孝義推之

閻俊彥靈石人嘗建議學以教里中子弟乾隆己酉歲饑糴米拯急鄉人德之

祁霖興靈石人幼孤事母以孝聞兩兄善病奉侍周至嘗於途中得遺金三百俟其人還之又嘗省工墳塋大雨遇少婦溺溝中呼傭者拯之向晚雨不止坐側止一屋乃令婦宿而與傭者坐檐下竟夕從兄霖充事親孝厚於鄉里賑饑修道多所倡始

梁煥梁元燾雷澤中並靈石人與員外郎楊涵並好施子喜營建其義舉如河隄渡船茶亭之屬多倡爲之

張岱霍州監生嘉慶乙丑倡設粥賑又別出米以施老弱之不能就食者開渠引泉水溉村中田鄉人利賴之

蒲俊霍州人嘗拾遺金訪還之

陳德隆靈石人敦倫尚義嘉慶丙寅歲饑輸穀二千石棉衣三百領賴以存活者甚衆後官平江令修書院輯縣志政教甚行未期年卒於任士民遮道祭送哭失聲

吳國泰靈石人信義孚於鄉里尤篤友誼耿養善家僅中貧而樂善不倦丙寅糴米救饑復倡建安濟橋以利行旅

楊尙文字墨林靈石人性豪邁喜讀書有氣節居京師構園林所與遊皆一時名士文酒過從緩急不吝推解有鄭莊置驛之風平定張穆嘗館其家刊連筠移叢書當世重之

右諸州屬三百二十九人

又一百一十二人附見